



A lokisetse Morena Sechaba se phethehileng (Luka 1,17)

Tel: 28 350 466/ 62600983 (WhatsApp)

M5.00

MOELETSI OA BASOTHO

PARARE DOMINO PLEBEM PERFECTAM

**Litlokotsebe
li ruthutha thepa**


5

Khaho e hatela pele

7



SEKHAMANE O CHOFA 'MUSO

www.moeletsioabasotho.co.ls

Re se re fumaneha ho marangrang

Email: newsroom@moeletsioabasotho.co.ls
Tel: +266 28350466/ Whats app: 62600983

MOELETSI

Makhotla a phahamisitse

Likotlo tse fuoang litloli tsa malao morao tjena li'a khotat-sa, 'me e tla ba thuto ho ba bang ba ntseng ba le morerong oa ho etsa botlokotsebe bofe kapa bofe. Haele babolai le libeti bona ke ba kopela hore makhotla a hle a ba pitile ha holoanyana. Ke batho ba tletseng bokhopo ba bile ba se na qenehelo ea letho ha ba etsa mosebetsi oo oa bona oo khopo o soto. Ke batho ba sebete hona hoo, ba se nang letsoalo la ho bolaea, feela ba se na tokelo ea ho nka bophelo ba sebupuo sa Molimo.

Likahlolo tsena tsa molao mohlomong li tla theola kapa hona ho beha naha ea rona hantle machabeng. Hajoale Naha ea Lesotho e hlaha holimo hampe ho linaha tse phahameng haholo ka lipolao tsa batho, bosholu le lipeto. Ha ho fete beke ho se mokhosi oa setopo sa motho ea bolailoeng a lahleloa moo. Lefu la motho ha le felle feela. Bana ba batho ba ile ba bolaoa ka sehloho le ho akheloa ka ho le leng la matomo kahar'a naha.

Tšepo se sechaba sa Basotho ntlheng ea tsireletso e ho Litsi tsa Tsireletso, empa ke mona hampe kapa ka bomalimabe ba bang ba ikhethela ho bolaea ka sehloho ba bang bana ba Basotho. Ke hopola moetapele e mong oa lipolotiki a re litloli tsa molao li tsoaroe ka tsela eo e tla re ha li hopola ho khutlela ka moo, motho a re setsoeng ka Ha Molapo, etsoa ngoana cheleng o tšaba mollo. Ha ho motho ea kaholimo ho molao, bohle ba entseng tlole ea molao ba nkeloe kapel'a makhotla a tsebe ho aba toka.

Makhotla a phahamisitse likausi morao tjena, ha ho ngoana e motle li nyeoe li buoa li fele. Ke taba e ntle ho batho ba balli ha ba sebeletsoa ka nako, ba molato ba ahloleloa seo ho fun-goang ba le molato ho sona.

Ke bona tšubuhlellano e ngata ka Litsing tsa Tlhabollo ea Batšoarua morao tjena. 'Me moo batho ba leng bangata haholo, tsoatso ea mafu le eona e kena ka sekhahla se holimo haholo. Ha 'muso o thiba ka nqena, joale ka mona ho tlo baka kotsi. Keletso ke hore meaho e atolosoe le likotlo li phahame haholo ho feta mona e le ho eketsa tšabo. Leha ho joalo baohloli bana ba tsoare hantle haholo, naha e tsoenyehile ke boemo bona ba litaba, e hleke le'a ba pitla.

Bophatlalatsi ke e 'ngoe ea litšia tsa naha kanngoe, hobane bo thusa 'muso ka ho fetisetsa litaba ho sechaba molemong oa hore se ruoe tsebo le ho se beha leseling.

Hase khale ha e mong oa bo-ralitaba a koetloa le hona ho khakhathoa, kajeno ke thepa ea se seng sa li-ea-le-moea kahar'a naha, se senyetsoa thepa hampe feela ho se qenehelo ea letho. Lona lisinyi bonang kamoo le sitetsoeng sechaba kateng kantle le kahare ho naha. Bamameli ba sitoa ho fumana litaba tsa letsatsi le letsatsi, tsa hole le haufi le ho ba sehlohlolong sa lietsahala.

Ruri le rona joaloka MISA Lesotho le Letona la Likhokahan-yo re re taba eo empe, hobane e beha bophelo ba bo-ralitaba tlokotsing le matsoalong a maholo, moo ba tla tšaba ho tlaeha litaba tsa 'nete ka bolokolohi.

Se-ea-le-moea ke sethala se tlhorong ho fetisa litaba le ho sebetsa le sechaba 'moho le ho tliša tharollo litabeng tse se amang. Joale ke mona litlokotsebe li fihla li senya thepa ka lon-ya le bokhopo, e le hore sechaba se sotlehe. Letona le bontšit-se hore ho tlemaha hore ho sireletsoe meralo ea motheo le lisebelisoa tsa puisano. Khaotsang ho senya thepa ea sechaba se se nang molato oa letho.

Kamor'a nako e telele haholo batho ba nang le bokooa ba kutlo le pono ba sa eloe hloko ntlheng ea ho tšela tsela le bona ka polokeho. Sena se etsahetseng ke nalane, ho latela na ke khale ha kakang bana batho ba rothisa likeleli mahlong ho se ea ba elang hloko.

'Muso o kentse mabone a sephethephethe a tlo thusa bohle ba nang le bokooa ba pono le kutlo. Ba nang la bokooa ba pono, ho tla utloahala molumo oa hore joale ho bolokehile hore a ka tšela, athe ba nang le bokooa ba kutlo ba tla itšetleha ka linomoro tse bontšitsoeng maboneng a sephethephethe, ho tseba nako e setseng ea ho tšela tsela ka polokeho. Ruri ke boiteko bo botle bona ba 'muso ba ho se khethe nku ka pere. Hohle ke Lesotho.

MOLIMO A BOLOKE LESOTHO LE BASOTHO



Ba nang le bokooa ba eloa hloko

Nthabeleng Seithleko

Letona la Mesebetsi ea Sechaba le Lipalangoang, Mohlomphehi Matjato Moteane, o phatlalaitse ka molao tsamaiso e ncha ea mabone a sephethephethe, Maseru, e reretsoeng ho etsa hore batho ba tšele litsela ka polokeho le ho nolo-faetsa batho ba nang le bokooa.

Mabone ana a macha a hlaisitsoe kamor'a ho hlokomela hore litsamaiso tse neng li sebelisoa pele, li ne li sa natse ka ho lekaneng litlhoko tsa batho ba nang le bokooa ba pono le ba kutlo. Mosebetsi ona o bile ka la 14 Loetse monongoha.

H'a ntse a tsebisa sechaba ka tsamaiso ena, Moteane o bontšitse hore mabone a ntlafalitsoeng a na le linomoro tse bal-

ang nako e setseng le matšoao a molumo, e le ho thusa batho ba nang le bokooa bo fapakaneng.

O itse matšoao a molumo a reretsoe ho tataisa batho ba nang le bokooa ba pono, ho kenyeletsa le ba sa boneng mabone a sephethephethe, ka ho fana ka melumo e ba tsebisang hore na ke nako efe e loketseng le e bolokehileng ea ho tšela tsela.

Mookameli e Moholo oa Mamekhatlo oa Batho banang le Bokooa (LNFOD), Rabasotho Moeletsi, o itse batho ba phelang le bokooa ba qetile nako e telele ba siiloe morao lintlafatsong tse ngata. O hlalositse mohato ona e le qalo e ntle tseleng e isang ho kenyeletsoeng ha batho bohle.

Ka lehlakoreng le leng, Mookameli e Moholo oa Letlole la Litsela, 'Matšepang Sekhokoane, o itse ba thabetse ho kenya

letsoho licheleteng tsa morero ona, kaha bo bong ba boikarabello ba bona ke ho netefatsa tšebeliso e bolokehileng ea litsela ke batho ba tsamaeang ka maoto le ka likoloi.

Batho ba nang le bokooa ba kutlo bona ba ka itšetleha ka linomoro tse bontšitsoeng maboneng a sephethephethe, ho tseba nako e setseng ea ho tšela tsela ka polokeho.

Morero ona o reretsoe ho khothaletsa kenyeletso le ho netefatsa hore batho ba phelang le bokooa ba khona ho tsamaea litseleng ka boikemelo bo eketsehileng le ka polokeho.

Ho lebelletsoe hore ho hlalisoa ha mabone ana a fihlellehang ho tla kenya letsoho ntlafatsong ea polokeho, le ho aheng meralo ea motheo ea sechaba e kenyeletsang bohle motse-moholo Maseru.

Contacts: +266 28350 466

62600983 WhatsApp

Email: newsroom@moeletsiobasotho.co.ls

Sales and Marketing: (+266) 28 350 466/ 57396597 (WhatsApp)

MOELETSI oa BASOTHO
A LOKISETSE MORENA SECHABA SE PHETHEHLENG (LUKE 1:17)

EMAIL: editor@moeletsiobasotho.co.ls
sub-editor@moeletsiobasotho.co.ls
Mohale Lehlohonolo (Sub-editor)
(+266) 58 771 507 / 62 771 507

Journalists

Nthabeleng Seithleko
Tšelisio Thakholi

57 665 038/ 68 216 271
58 540 853/ 63 480 404

Production Desk: 'Mateele Liqa

Masole ahloloa lilemo tse 20

Nthabeleng Seitlheko

Nyeoe e nkileng nako e telele ka ho fetisisa le ho hapa maikutlo a sechaba, e neng e ama litho tsa Sesole sa Lesotho, e fihlile pheletsong ka la 14 Loetse monongoaha, kamor'a hore Lekhotla le Phahameng le ahlolele Lekhooa Moepi, le Tieho Tikiso ho hlola lilemo tse 20 ka Setsing sa Tlhabollo ea Batšoaruoa.

Banna bana ba babeli ba ile ba fumanoa ba le molato khoeling e fetileng oa polao ea Lekhoele Noko, Khothatso Makibinyane le Molise Pakela, bao ho tlalehoang hore ba ile ba koeteloa ka Motšeanong 2017, ba khangoa ka ho bipetsoa ho fihlela ba hlokahala, 'me litopo tsa bona tsa lahleloa ka letamong la Mohale. Litopo tsena li ile tsa fumanoa ka Loetse 2017.

Lekhotla le laetse hore Moepi, ea fumanoeng a le molato oa qoso e le 'ngoe ea polao le ea ho koalla Noko ntle ho molao, a sebeletse likahlolo tseo ka nako e le 'ngoe. O aholetsoe lilemo tse 20 bakeng sa polao le lilemo tse tharo bakeng sa ho koalla motho ntle ho molao. Leha ho le joalo, Lekhotla le laetse hore lilemo tse robong tseo a seng a li qetile litlamong li nkoe e le tseo a seng a li sebeletse, ho tloha ka la 29 Loetse 2017, ha a ne a tšoaroa le ho kenngoa teronkong.

Ka lehlakoreng le leng, Tikiso ea fumanoeng a le molato liqosong tsohle tse tharo tsa polao, o aholetsoe lilemo tse 20 bakeng sa polao ka 'ngoe. Likahlolo tsena li tla sebeletsoa ka nako e le 'ngoe, ho tloha ka la 29 Loetse 2017. Lekhotla le boetse le laetse hore lilemo tse robong tseo a seng a li

qetile litlamong li nkoe e le tseo a seng a li sebeletse.

O boetse a re mochochisi o hlolehile ho bitsa batho ba bang ba neng ba boletsoe ke lipaki tse ling hore ba tle ba fane ka bopaki. Ho feta moo, o ile a hlokomela hore lipaki tse ling tsa 'muso li ne li hanyetsana lipolelong tsa tsona.

Ho tlalehoa hore bafu bana ba bararo e ne e le ba bang ba babelaelloa ba ileng ba tšoaroa ke mapolesa ka Motšeanong 2017, kamor'a ho thunngoa ha batho borokhong ba Maseru. Ketsahalong eo, litho tse peli tsa sesole le morekisi oa seterateng ba ile ba thunngoa.

Private Halekhethe Nkonyana o ile a tsoa likotsi, athe Private Katleho Seliane le Moiketsi Makhabane ba ile ba hlokahala.

Babelaelloa ba ile ba lokolloa litlamong tsa

mapolesa kamor'a hore ho fumanoe hore ho ne ho se na bopaki bo lekaneng khahlanong le bona. Leha ho le joalo, Motlatsi Rantaoana o ile a qosoa le ho fumanoa a le molato mabapi le ketsahalo ena, kamor'a lipatlisiso tse kopanetsoeng tsa mapolesa le sesole.

'Muelli oa baqosuo nyoeeng ena e ne e le Adv. Qhalehang Letsika, athe mochochisi o ne a emetsoe ke Adv. Motene Rafoneke.

Ho sa le joalo, Lekhotla le Phahameng le boetse le aholetse Moeketsi Sefafe oa Mapoteng Berea, ho hoehla chankaneng ea Maseru ho fihlela a lokoloe ke Motlotlehi, tlasa ho bitsoang 'King's Pleasure'. Litaba tsena li bile kapel'a moahloli 'Mabatšoeneng Hlaele ka la 15 Loetse monongoaha

Qeto ena e tlele kamor'a hore liakhente ka

bobeli, ea moqosuo le ea bochochisi, li lumellane le tlaleho ea baoki ba mafu a hlooho hore moqosuo enoa, ha a boemong ba ho tsoelapele ka nyeoe ena, ka labaka la hore o na le bothata ba keello.

Lekhotla le laetse hore moqosuo a koalloe ka thata. La re a fuoe tšireletso e matla, kaha a ka ba kotsi ho eena le ho batšoaruoa 'moho le eena, a fuoe litokelo tsa batšoaruoa ba ahlotoseng, ho kenyelletsa litlhare tsa mafu a hlooho.

Sefafe o ile a tuma haholo ka lebitso la Mali-a-Konyana, kamor'a ho tšoaroa ka polao ea ntata'e le ho noa mali a hae. Litlaleho li re moqosuo enoa o boetse a bolaea motšoaruoa 'moho le eena sepoleseng sa Mapoteng.

Ho sa le joalo, Mali-a-Konyana o ile a fenetha motšoaruoa e mong chankaneng ea Maseru, le eena ka ho



MOELETSI O TŠEHETSA BACHA

Tšeliso Thakholi

Ha o feta kahare ho motse oa Masowe tlasa Kereke ea IPHC tseleng e lebang Tsoapo-le-Bolila, teropong e kholo ea Maseru o utloa ka monko oa lijo tse monate, o lutlisang mathe hoseng le har'a mpa ea motšoare. Monate ona o tsoa Nandi Kitchen Hub ea ausi 'Mannane Motaba eo e leng setsebi se hloahloa sa mopheho ea sa tsoa qala mosebetsi oa hae ka Phato ngoahola.

Ka lebaka la hoba le lerato le tebileng la mopheho, le pele a ea sekolong o ne a se a qalile khoebo e nyenyane ea mopheho e leng Nandi Kitchen Hub. Mocha enoa ea bonahalang a ena le lerato le leholo la mopheho e bile a tseba hantle seo a se batlang bophelong, hang ho ba a khutle sekolong sa mopheho sa 'Mamohato Catering Institution tikolohong ea Morija ka 2021, o ile a hla a ipabola ka talenta ena ea hae.

MEFUTA EA LIJO

Mefuta ea lijo tseo ke li phehang ke tse ikhethang tse phehiloeng ka makhetha a maholo tse kang Chinese food, Kota, Dogwood, Likukuku tse fapakaneng joaloka ka Scones, Muffins le Rock Buns. Lijo tsa rona li monate, li phehiloe ka makhetha ke setsebi sa mopheho e bile li le lithoko li tlase haholo. Ka thoko ho mona re boetse re ipabola haholo ka ho phehela batho mefuta ea lijo tseo ba li batlang ha ba ena le lithupelo, mekete ea tsoalo, mekete ea manyalo le ea boithabiso. Re na le tee ka mefuta ea eona bakeng sa Mariha le Hlabula, 'me Basotho bohle re ba amohela ka liatla tse peli.

NANDI KITCHEN HUB

Kaha kichini e sa ntse e le ncha haholo e sa ntse



e fumaneha Masowe feela, 'me morero ke hore e hole e anele Maseru le literopong tse ling kahare ho naha. Hantle nka thabane haholo ha nka fumana Nandi e se e le boemong ba likhoebo tse kholo tse rekisang lijo, hobane ke tseba ho pheha lijo tse fapakaneng, empa e le hobane ke hona khoebo e ntseng e hola.

Lebaka le leng ke hobane ke ne ke batla hore ke qale boemong bo tlase ho fihlela ke ba ke fihla boemong bo holimo. Ka bona ho le bohlokoa hore ka tsebo eo ke nang le eona ke se ke ka lula feela ke tsoelepele, e le hore e tle e se ke ea qetella e ntahlehetse. Hape 'na ka 'nete ha ke thabele ho chona, ho ba ha motho a chonne a se a bile a hloka leha e le Loti feela, o ba le khatello e ngata haholo ea maikutlo. Bonyane boo ke nketseng ke bo fumana ke bona bo tlišitse phetoho e kholo bophelong ba ka.

LIQOLOTSO LE LIKATLEHO

E re kaha khoebo ena e sa ntse e le ncha haholo ke atlehile ho hira bacha ba babeli ba nakoana, 'me ke sebetsa le bona ha re fumane mosebetsi oa ho ea phehela batho ba bangata. Empa kahar'a kichi-

ni ke ntse ke pheha ke le mong, kaha e le hona e ntseng e hola 'me e-s'o tsebahale haholo. Morero e ntse e le hore ke fumane

TLHOKOMELISO HO BO-ABUTI

Ho lona bo-abuti ba nang le litsebo tsa mophe-

motho fatše o mo ise moo a neng a sa nahana hore a ka fihla.

Mosebetsi oa ho pheha o teng kantle ka mona o mongata haholo, ho sa tsotellehe hore na motho ke abuti kapa ausi le hore na o fihlelletse boemo bo fe ba thuto. Ke rata ho le hlokomelisa lona bo-abuti hore ha hona mosebetsi o monate joaloka oa ho pheha, ho ba ka ona o ka phela le ho phelisa bacha ba bang.

KELETSO HO BACHA

Bacha ke le khothaletsa ho ikitlaelletsa ho itšebetisa ka matsoho a lona hobane ha ho sana mesebetsi ho hang, 'me ha re ntse re lutse feela ka litsebo tseo re nang le tsona re emetse ho tla hiroa, le hona re sa tsebe hore na re tla hiroa neng, re ntse re ipakela mathata a maholo ao re ka qetellang re se ntse bophelo ba rona ka ho kena linthong tse



ke sebetsa le bacha ba bangata e le ho leka ho loantšha boemo bona ba tlhokahalalo ea mesebetsi kahare ho bona.

Ke ile ka atleha ho fumana mosebetsi oa ho ea phehela e 'ngoe ea likampani tse kholo, e le moo ke ile ka hira bacha bao ba babeli bao ke seng ke tla 'ne ke sebetsa le bona ha mosebetsi o le mongata. Ka 'nete liqholotso tsona lia fokola ho ba re sa qala.

ho(Chef) ke kopa le e le hloko hore mopheho ha se ntho ea bo-ausi kapa bo-'m'e feela. Taba eo ha e sa le ntho e teng ho hang, e bile mophehong mona ka 'nete bophelo bo teng ha feela le ena le lerato la ho pheha. Ho sa khathalletsehe hore na motho o qala ha 'nyane ha kae ha feela le ena le lerato le sebete sa ho qala le tla fihla moo le batla ho ea teng. Mopheho o tlosa

senang thuso tse kang tsa tšebeliso ea lithetefatsi, tai le bokhachane bo sa re-roang.

Ke bona ho le molemo hore re iketsetse ka matsoho a rona, hobane le naha ena ea habo rona hore e tle e fetohe e be seo re se batlang ke ka rona bacha. Ka 'nete sohle seo re ka se etsang ha feela se fetola le ho matlafatsa bophelo ba rona re se etse ka matla a maholo.

Litlokotsebe li ruthutha thepa

Nthabeleng Seitlheko

Mokhatlo oa Bophatlalatsi Hloahloeng e Afrika, (MISA) Lesotho e khalema ka matla t'senyo ea thepa ketsahalong ea botlokotsebe e etsahetseng mafelo a beke , se-ea-le-moeeng sa KEL, polelong ea eona ea la 15 Loetse monongoaha MISA e re e ngonoreile, hape e ema le bookame-

se ntseng se le tlhorong ho fetisa litaba le ho sebetsa le sechaba 'moho le ho tli-sa tharollo litabeng tse se amang. E boetse e thoholetsa le ho ananela seabo sa Letona la Likhokahan-
yo, Mohlomphehi Nthati Moorosi ka ho etela se-ea-le-moea sena ka seqo, hape ba ananela ha taba ena e se e le matsohong a sepolesa ho e fuputsa. Letona Moorosi le ile la etela se-ea-le-moea sa KEL ka la 14 Loetse monongoaha, kamor'a lit-


amana le ketsahalo eo. Letona Moorosi o ile a tiisa bohlokoa ba ho sire-letsa meralo ea motheo le lisebelisoa tsa puisano, a hlokomelisa hore lisebeli-soa tsena li phetha karolo ea bohlokoa hore sechaba se tsebe litaba. Ho sa le joalo, Motsa-maisi oa se-ea-le-moea, 'Malichaba Phechela, o ile a leboha Letona ka ketelo le tšehetso ea lona nakong eo a e hlalositseng e le nako e thata bakeng sa se-ea-le-moea. Phechela o boletse hore



li ba KEL nakong ena e thata ea ketsahalo ena e malimabe, 'me ba re ho senya thepa eo ea khaso, ho sa tsotellehe se thoko-tseng seo, empa ke ket-so e sa amoheleng ho hang. Ho sa le joalo, MISA e re se-ea-le-moea ke sethala

laleho tsa hore lisebelisoa tsa sebaka seo le thepa ea ka tlung li senngoe. Nakong ea ketelo eo, Moorosi o ile a nyatsa ket-so eo ea tšenyo. O ile a bontša hore hoa khotat-sa hore mapolesa a se a khethile batho bao ho be-laelloang hore ba ka 'na ba

ketelo ea Letona e bontši-tse hore Lekala le amehile ka ketsahalo eo, 'me e matlafalitse batsamaisi le basebetsi ba sona. O itse o leboha tšehetso eo, 'me o tšepa hore taba ena e tla rarolloa ka lipat-lisiso tse ntseng li tsoela pele tsa mapolesa.



Letona la mehleng le orohile

Nthabeleng Seitlheko

Lelapa la mofu la letona la mehleng la Bophe-lo, Mohlomphehi Nyapane Kaya, le boletse hore lepato la hae le lebel-letsoe ho tšoareloa Butha-Buthe ka la 10 Mphalane monongoaha. Mora oa mofu Teboho Kaya, o boletse hore ntate

Mechachane No. 1. Kamor'a tlhelo ea ABC likhethong tsa akakaretso tsa selemo sa 2017, Tha-bane o ile a theha 'muso oa kopanelo, 'me a khetha Kaya hore e be Letona la Bophelo. Kaya o ile a tsoela pele ho ba setho sa Paramente kamor'a ho tlo-ha ho ABC. Ka Phupjane 2020, o ile a khethoa hore a qothisane lehlokoa le bo-emo ba Motlatsi oa Sebo-holi sa Seboka sa Naha. O ile a khethoa ke litho tsa



oa hae ea lilemo li 62 o hlokahetse ka la 12 Loetse kamor'a ho kula nako e ka etsang selemo. Kaya e ne e le setho sa mokha oa All Baso-tho Convention (ABC), o thehiloeng ke Tona-Kholo ea mehleng, Dr. Thomas Thabane. O ile a kenela mokha ona matsatsing a oona a pele, e sa le mo-suo, eseng ralipolotiki ea mafolofolo. Kaya o kile a bolela hore o ile a kenela ABC "ho tloha letsatsing la pele leo o the-hiloeng ka lona." Hamorao o ile a ba moemeli oa ABC seterekeng sa likhetho sa

bohanyetsi 'me a qothisa-na lehlokoa le Lebohang Ramohlanka. Ramohlanka o ile a hlo-la likhethong tse ileng tsa latela ka likhetho tse 61 khahlanong le tse 48, ho bolelang hore Kaya o ile a hloloa ka likhetho tse 13. Kamor'a ho kenela MEC, Kaya le eena o ile a qetella a tlohile mokheng oo. Ka 2023 o ile a kenela DC, o etelletsoeng pele ke Mathi-beli Mokhothu. Kaya o hlokahetse a ntse a tsoelapele ka lithuto tsa bongaka tsa PHD Uni-vesithing ea Sechaba ea Lesotho (NUL).

57396597
28 350 815

Mazenod PRINTING WORKS (Pty) Ltd
28 350 466
lesaoanats@gmail.com

Scan me
U se u ka fumana
buka ea
Malebela ho
marang-rang a
boletsoeng ka tlase
kapa oa sebellsa code
e kaholimo.

"Get the Akello app on Play Store, App Store, or Huawei App Gallery for Mazenod books and more. Download now!"

<https://library.akello.co/downloads>

Lesotho le fumana lisebelisoa



Nthabeleng Seitlheko

Mokhatlo oa Lefatše oa Bophelo (WHO) le Pandemic Fund li fane ka lisebelisoa tsa bongaka le tsa marang-rang a puisano le tlhahisoleseling (ICT) tsa boleng ba chelete e kaalo ka M2.5Millione, ka sepheo sa ho matlafatsa tlhokomelo ea mafu, thuso ea mafu a seoa le phano ea litšebeliso tsa bophelo bo botle Lesotho.

Lisebelisoa tsena li nehelano e Lekaleng la Bophelo ka la 11 Loetse monongoha, e le karolo ea boiteko ba ho matlafatsa bokhoni ba naha ba ho thibela, ho lemoha le ho arabela mathata a bophelo bo botle ba sechaba.

Moemeli oa WHO Lesotho, Dr. Innocent Nuwagira o itse lisebelisoa tsa ICT li rekiloe ka lichelete tsa morero oa Pandemic Fund, ha WHO e le mokhatlo o ikarabellang bakeng sa ho phethahatsa morero oo.

O itse morero ona o shebane le ho matlafatsa tsamaiso ea tlhokomelo le ho phekola mafu a ipapisitseng le mohopolo oa Bophelo bo le Bong Afrika Boroa, e le karolo ea boiteko ba ho sebetsana le ho qhoma ha mafu ho susumetsoang ke phetoho ea boemo ba leho-

limo.

Dr. Nuwagira o hlalositse hore lisebelisoa tsa ICT li kenyeletsa lilaptop tse 53, likomporo tse 20, matlapa a 'electronic' a 35, limodem tse 20 tsa khokahanyo ea data le marang-rang, hammoho le mananeo a komporo a sebelisetsoang tlhahlobong ea lipalo-palo.

O boetse a re lisebelisoa tsa bongaka li kenyeletsa mechine e 138 ea ho lekanya tsoekere maling, li-stethoscope tse 227, mechine e meraro ea ho hlahloba tšebetso ea pelo likhalase tse 'ne tsa tšire-

letso, mabokose a 10 a liphaephe tse lahloang tsa molomo le lebokose le leng la lisebelisoa tsa ho tsamaisa mehlala ea liteko.

Mongoli e Moholo Lekaleng la Bophelo 'Matšoanelo Monyobi, o itse lisebelisoa tsa ICT li tla ntlafatsa puisano, tsamaiso ea tlhahisoleseling le phano e sebetsang ea mananeo a bophelo bo botle.

O itse lisebelisoa tsa bongaka tsona li tla fa basebetsi ba bophelo bo botle lisebelisoa tse hlokaahalang ho ntlafatsa tlhokomelo ea bakuli.

Monyobi o tiiselitse balekane hore lisebelisoa tsena li tla sebelisoa ka nepo, 'me li tla thusa ho ntlafatsa phano ea litšebeliso tsa bophelo bo botle le bokhoni ba ho lemoha mafu kapele. O bontšitse hore lisebelisoa tsa bongaka li tla abeloa litsi tse fapakaneng tsa bophelo ho latela litlhoko tsa setsi ka seng.

Mashoai o itse Pandemic Fund ke mokhoa oa lefatše oa ho fana ka lichelete o thehiloeng ho thusa linaha ho matlafatsa bokhoni ba tsona ba ho thibela mafu a seoa, ho itokisetša ona le

ho arabela ho 'ona.

A re lisebelisoa tsena li kopiloe ke naha hobane ho na le tlhoko e joalo. Tsona li kenyeletsa Naha ea Botswana, Lesotho, Madagascar, Malawi, Mozambique, Namibia, Afrika Boroa le Zimbabwe, 'me li kopane le Mokhatlo oa Lefatše oa Bophelo le balekane ba bang ho phethahatsa morero o kopanetsoeng oa linaha tse robeli, o reretsoeng ho matlafatsa bokhoni ba ho thibela mafu a seoa, ho itokisetša ona le ho arabeloa ha 'ona linaheng tsa Afrika.



Khaho e hatelapele

Nthabeleng Seithleko

Ho phetheloa ha marokho a Mabunyaneng le Khubelu ho tisa tšepo e ncha ho baahi ba Mapholaneng le libakeng tse haufi, kaha baahi ba tla khona ho tšela linoka ka polokeho le ho fihlella litšebeliso tsa bohlokoa ntle le tšitiso ea maeto e bakiloeng ke khaello ea marokho.

Marokho ana a mabeli, a ahiloe moo noka ea Khubelu le Mabunyaneng li kopanang teng Mapholaneng, Mokhotlong, a ile a buloa ka molao ka la 11 Loetse monongoaha ke Letona la Lihloloeng, Mohlomphehi Mohlomi Moleko le Letona la Metsi le Bohloeki la Afrika Boroa Pemmy Majodina. Ketsahalo ena e tsoaea mohato oa bohlokoa phethahatsong ea karolo ea bobeli ea Morero oa Metsi oa Lihlaba tsa Lesotho (LHWP).

Mookameli oa Morero oa Metsi a Lihlaba tsa Lesotho (LHDA), Tente Tente, o itse marokho ana a tla thusa ho khutlisetsa le ho matlafatsa khokahano ea sechaba, haholo-holo libakeng tseo ho tšela linoka ho neng ho le kotsi kapa ho thatafalletsa baahi ho fumana litšebeliso.

O itse bana ba sekolo ba tla khona ho ea lithutong ka polokeho, batsoali ba fihlelle litšebeliso tsa bophelo le tse ling tsa bohlokoa, ha lihoai tsona li tla khona ho isa lihlahisoa tsa tsona limmarakeng ntle le ho beha bophelo ba tsona kotsing. "Marokho ana a tla thusa sechaba ho fihlella litšebeliso tsa bohlokoa, 'me lihoai li tla khona ho fihla limmarakeng ka polokeho", a rialo.

H'a fana ka tlaleho ea tsoelo-pele ea LHWP Karolo ea II, Tente o itse ho latela tlaleho ea bofelong ba Phato 2026, morero ka kakaretso o ne o phethetsoe ka liperesente tse ka bang 57.

O itse khaho ea tonoro ea Polihali e ntse e tsoela pele, 'me e lebeletsoe ho phethoa ka 2029. Letamo la Polihali le lona le ntse le ahoa, 'me ho lebeletsoe hore le qale ho bokella metsohi pakeng tsa 2028 le 2029. Ho lebeletsoe hore mathoasong a 2030 metsi a tla qala ho fetisetsoa ho tloha Polihali ho ea letamong la Katse.

Mabapi le menyetla ea mesebetsi, Tente o itse ba-

tho ba ka bang 16 700 ba se ba ruile molemo ka mesebetsi ho tloha ha morero o qala, bao ho bona ba ka bang 4 000 e leng basebetsi ba sa hlokeneng litsebo tse khethehileng, boholo ba bona ba tsoa Mokhotlong.

Tente o boetse a hlalosa hore LHDA e se e qalile ho fallisa malapa a anngoeng ke phethahatso ea morero. O itse malapa a 100 ho a 220 a reretsoeng ho fallisoa a se a qalile ho fallisoa, ha malapa a 41 a khethile ho

Sechaba le Lipalangoang, Matjato Moteane, o itse 'muso o ikemiselitse ho netefatsa hore sechaba se tsoela pele ho ba le khokahano e sireletsehileng ka ntšetsopele ea meaho e tsoarellang, ho kenyeletsoa litsela le marokho. O itse ntšetsopele ea meaho ke e 'ngoe ea lintho tse tlang pele Leanong la Bobeli la Ntlafatso ea Naha (NSDP II).

Letona la Metsi le Bohloeki la Afrika Boroa, Pemmy

a khothaletsa tšebeliso e baballang ea metsi ka lebaka la litlamorao tsa phetoho ea boemo ba leholimo.

Letona la Lihloloeng Mohlomphehi Mohlomi Moleko le itse LHWP ke pontšo e matla ea seo Lesotho le Afrika Boroa li ka se fihlelang ka tšebeliso no-'moho. Leha ho le joalo, a re boikarabello bo teng hona joale ke ho netefatsa hore melemo ea tšebeliso no-'moho ena e fihla le ho sechaba se itsetseng le ho

thabeng.

Ketsahalo ea ho bula marokho ana e boetse e tsoaea lilemo tse 40 tsa tšebeliso no-'moho le tsoelo-pele ea tikoloho ho tloha ha tumellano ea LHWP e tekenoa ke mebuso ea Lesotho le Afrika Boroa.

LHDA e fane ka konteraka ea khaho ea marokho ana ho CONCOR Nthane Brothers M&K Bridges Joint Venture ka chelete ea M511, 500, 000.00

Marokho a Mabunyaneng le Khubelu a arohane ka limithara tse ka bang 500 feela, moo linoka tse peli li kopanang teng. A fu-



iphallisa ho latela leano la phalliso.

Taba ena e hlalisa tlhokahalo ea hore malapa a amehang a fuoe tšehetso e lekaneng, matšeliso a loketseng le maemo a bophelo a sa ba theoleleng seriti kapa ho ba siea ba le maamong a mabe ho feta pele. "Limilione tse sebelisitsoeng ke chelete e ileng ea fihla ka kotloloho lipokothong tsa batho," ho boletse Tente.

Litabeng tse ling ba lokela ho bona hore ho ba le makhulo a sireletlitsoeng a thusa ho boloka mobu, metsohi le mehloli ea bophelo ba sechaba. Tente o itse LHDA e sebelisitse chelete e ka bang M51Millione lenaneoing la Integrated Catchment Management (ICM), le reretsoeng ho sireletsa le ho nchafatsa makhulo le libaka tsa pokello ea metsi.

O itse lenaneo lena le se le koahetse lihekere tse 12 000 tsa mosebetsi oa ntlafatso, 'me batho ba ka bang 12 600 ba unne molemo ka menyetla ea mesebetsi e hlalisitsoeng ke lenaneo.

Letona la Mosebetsi ea

Majodina, le itse batho ba anngoeng ke phethahatso ea morero ba lokela ho fumana matšeliso a loketseng e le hore bophelo ba bona bo ntlafale.

O itse Afrika Boroa e ntse e tsoela pele ho fumana metsi Lesotho, 'me bohle ba lokela ho fihlella metsi a hloekileng. Leha ho le joalo,

itella phethahatso ea morero.

A phaphatha LHDA, borakonteraka le baeletsi ka mosebetsi oa ho netefatsa hore sechaba se tsoela pele ho ba le khokahano e sireletsehileng le e tšepahalang, ho kenyeletsoa le khokahano ea Mokhotlong le litereke tse ling tsa li-

maneha likilomithara tse ka bang 22 pele ho borokho ba Senqu, boo bona bo leng likilomithara tse 15 ho tloha toropong ea Mokhotlong.

Borokho ba Senqu bo ile ba buloa ka molao ka 'Mesa selemong sena ke Motlotlehi Letsie III le President ea Afrika Boroa Cyril Ramaphosa.



Letona la lichelete le fuparolla seatla

Nthabeleng Seithleko

Letona la Lichelete le Meralo ea Ntšetso-pele, Dr. Retšelisitsoe Matlanyane, le hlakisitse hore Letlole la Lihlapiso (NMDS) le ntse le tsoelapele ho thusa baithuti ba bacha le ba ntseng ba tsoelapele ka lithuto tsa bona.

Letona le boletse sena ka la 16 Loetse monongoaha ha le fana ka polelo ka pel'a Ntlo ea Bakhethoa, moo le hlalositseng hore lichelete li se li rometsoe Litsing tsa Thuto e Phahameng, 'me li abetsoe baithuti.

Le boletse hore Letlole le hakanyetsoa ho feta M1Bilione selemong sa lichelete sa 2026/2027, 'me tebelo ke ho tšehetsa baithuti ba 22 034, ho tloha ho ba 21 889 ba ileng ba thusoa selemong sa lichelete sa 2025/2026.

Ho fihlela hajoale, ho se ho lefiloe chelete e fetang M175Millione ho baithuti ba ka bang 21 000, ho kenyeletsa baithuti ba selemo sa pele ba 2 868 le ba ntseng ba tsoelapele ka lithuto ba ka bang 10 219.

Dr. Matlanyane o itse likopo tsa lihlapiso selemong sena li sebetsoa ka Bokamoso e-Portal, e leng karolo ea boiteko ba 'Muso ba ho ntlafatsa tsamaiso ea litšebeliso tsa likoloto le lihlapiso.

O hlalositse hore kabo ea lihlapiso e ela hloko palo ea baithuti e abetsoeng setsi ka seng, manane a baithuti ba amohetsoeng a rometsoeng ke litsi tsa thuto e phahameng, hammoho le hore na bakopi ba fihlela lipehelo tse behiloeng.

A re baithuti ba qetileng ho etsa likopo empa ba e-s'o fumane tšehetso, ba behiloe lethathamong la ba emetseng 'me ba tla shejoa hae ba fuoeng lihlapiso ba hana tšehetso eo.

Letona le boetse le ananetse mathata a bileng teng ka Bokamoso e-Portal, a kenyeletsang tiehiso tsamaisong ea 'muso le ho lieha ha Litsi tsa Thuto e Phahameng ho romela manane a baithuti ba amohetsoeng, e leng se ammeng nako ea kabo ea lihlapiso.

O itse 'muso o se o buisane le baemeli ba baithuti ho tsoa litsing tse fapaneng tsa thuto e phahameng ka sepheo sa ho rarolla mathata ana.

Ka hona, Dr. Matlanyane o kopile bohle ba amehang ho sebetsa 'moho le lekala ho netefatsa hore tsamaiso



Sepolesa se tšoenngoa ke tliekefetso

Tšeliso Thakholi

Sepolesa se ipiletsa ho beng ba liketso tse soto tsa tliekefetso ea maseea, bana, basali le maqheku ho emisa hang hang, kaha li senya seriti le tlhompheho ea banna le ho ama likelello tsa bana. Se boetse se e ntse tlhokomeliso ho sechaba ho fana ka bopaki bo felletseng e le ho potlakisa hore litlole tsa molao li behoe kapele ho Makhotla.

Litaba tsena li tla kamor'a hore monna oa Mosotho ea lilemo li 39, Maotlatlasi Moketsane oa Ha Bele seterekeng sa Mafeteng, a theohle ka Setsing sa Tlhabollo ea Batšoaruaa kamor'a ho tinngoa beile ke Lekhotla la 'Maseterata la Mafeteng a qosoa ka tliekefetso ka motabo. O tlii'o hlaha hape ka khotla ka la 24 Loetse monongoaha. Litlaleho tsa sepolesa li supa hore D/P/C Rapelang Thakanyane oa Lefapha la Tšireletso ea Bana le Tekano tikolohong ea Matelile, a fumane tlaleho ka ngoanana ea lilemo li 16 hore o hlekefelitsoe ka motabo.

Tlaleho e re lipatlisiso tsa sepolesa li ile tsa sibolla hore ka 31 Phato monongoaha, lehlatsipa le ne le emetse koloi e ba isang sekolong Motsekuoa. Ke mona moo moqusuo a ileng a le lumella ho lula ka tekesing ea hae ha eo e-s'o fihle. Tlaleho e re tekesi e ile ea tsamaea ho ea matelile ka lehlatsipa, 'me ea re ha le re lea theoha ha habo Ha Makhakhe, moqusuo e leng moqhobi a le hanela ka le reng ha le e-s'o lefe o tlii'o le khutlisetsa Motsekuoa.

Ea re ha baeti ba se ba theohile ho setse lehlatsipa, moqhobi o ile a laela mothusi oa hae ho mo fa sebaka le lehlatsipa. Ke mona moo a ileng a potetisa tekesi kamor'a matlo, a

le hlekefetsa ka motabo. H'a se a ikhotsofalitse ho etsa mosebetsi ona oa hae o litšila, o ile a bitsa mothusi oa hae ho tla felehetsa lehlatsipa ho ea setopong, moo le ileng la fumana koloi e ba isang sekolong.

Ho sa le joalo bahlankana ba babeli ba lilemo li 20 e leng Khotso Molefi oa Ha Thamae seterekeng sa Maseru le Tšeliso Moletane oa Liphiring seterekeng sa Maseru ba ahlotsoe ho hoehla lilemo tse tharo ka Setsing sa Tlhabollo ea Batšoaruaa ba sa itefelle ke Lekhotla la 'Maseterata la Mafeteng kamor'a ho fumanoa ba le molato oa ho utsoetsa batho thepa ka likhoka.

Litlaleho li supa hore mesong ea la 2 Loetse monongoaha monna ea lilemo li 45 oa Thabaneng, o ile a tlalehela sepolesa hore bahlankana ba bararo ba ile ba mo khaoletsa tseleng, a ena le e 'ngoe ea likharebe tseo a ileng a li fumana ho e 'ngoe ea matlo a rekisang mothamahane toropong ea Mafeteng, ba mo utsoetsa mohala oa thekeng le chelete e kaalo ka M6,000.00. Hoseng ha lona letsatsi le hlahlamang ba belaelloa ba boela ba utsoetsa ngoanana ea lilemo li 16 ka likhoka a le tseleng e lebang sekolong chelete e kaalo ka M50.00. Molefi le Moletane ba ile ba tšoaroa ke sepolesa ha 'melaelloa oa boraro a ntse a iphile limenyane, 'me sepolesa se mehlaleng ea hae.



so ea Letlole la Lihlapiso e sebetsa hantle.

Lintlha tse fumanoeng ke hore Sekolo se Seholo sa Sechaba (NUL) se abetsoe baithuti ba 1 944, moo ba 1,036 ba lebeletsoeng ho fumana tšehetso. Sekolo sa

Mesebetsi ea Matsoho sa Lerotholi le eona e na le ba 1140, moo baithuti ba 665 ba tla tšehetsoa, athe Sekolo sa Thuto tsa Mahlale sa Limkokwing e na le 1 250, 'me ba 705 ba lebeletsoe ho fumana tšehetso.

Sekhamane o chofa 'muso



Nthabeleng Seithleko

Mo t s a m a i s i oa Lipuisano ka Ntlong ea Bakhethoa, Mohlomphehi Tlohang Sekhamane, o nyatsitse ho khutsa ha 'Muso oa Lesotho mabapi le ho koetloa le ho hlokoatsoa ha moqolotsi oa litaba le 'muelli oa Litokelo tsa Mantlha tsa Botho, Kananelo Boloetse.

H'a bua Lekhotleng la Sechaba ka la 16 Loetse monongoaha, Sekhamane o itse ke ntho e mpe hore 'muso e be o mometse ha sechaba se emetse tlhaloso mabapi le ketsahalo ena.

O itse 'muso o ne o itlamme hore o tla fana ka polelo mabapi le taba ena, empa ho bonahala o thatafalloa ke ho tsoa puo. O re bohanyetsi bo hloka likarabo 'me taba ena ke tlhoba boroko.

Puisanong le Dr. Mahali Phomotsa ka la 16 Loetse, o hlalositse hore o tšoenyehile haholo ka boemo bo ntse bo mpefala kahare ho naha, moo batho ba sa sireletsehang le ho hlaseloa ka lebaka la ho buella sechaba le ho emela 'nete.

O itse liketsahalo tsena li na le matšoa a 'muso oa khatello, a re ketsahalo e amang Boloetse e nyarosa haholo, kaha ho bonahala eka ho ka ba le morero oa ho koala molomo oa bo-phatlalatsi.

O kopile 'muso ho itlhalosisa pepeneneng kapel'a

sechaba, a re sena se tla thusa ho sireletsa tsamaiso e ipapisitseng le botho le lerato la naha.

O boetse a re liketsahalo tsena li ama seriti sa Lesotho hampe, haholo-holo tabeng ea litokelo tsa botho, eo naha e sebelitseng ka thata ho fihlela maemo a eona machabeng. O phethetse ka ho ipiletsa ho 'Muso oa Lesotho hore o sebeletse Basotho, eseng ho fetoha mohlorigi oa bona.

Mokhatlo oa Litokelo tsa Botho, Section 2, le oona o hlalositse polelo ka la 15 Loetse monongoaha. Polelo ena e fapana le taba ea hore Letona la Toka Mohlomphehi Richard Ramoetsi, le Letona la Litaba tsa Likhokahanyo Mohlomphehi Nthathi Moorosi, ba khonne ho buisana le Boloetse ka mohala.

Mokhatlo o re Boloetse o ipatile molemong oa tšireletso ea hae, kaha ho ea ka Section 2, o ile a khutlisetsa moo a lulang teng, 'me a ntse a tšohile ka polokeho ea hae.

Section 2 e boetse e re e makalitsoe ke hore Boloetse o ile sepoleseng ka bo-ee-na ho tlaleha litaba tse mo amang, empa Mookameli oa Sepolesa a re o lokela ho hlaha hape ho tla hlakisa lintlha tse itseng.

Mokhatlo o re Sepolesa se lokela ho hlakitsa sechaba boemo ba Boloetse, tsoelo-pele ea lipatlisiso mabapi le ketsahalo eo, hammoho le mehato e nki-loeng ho fumana ba ikarabellang.



TSA KEREKE

Fr. Khoaele o fuoa thomo

Tšeliso Thakholi

Ke leboha ka pelo eohle ea ka lera-to leo bakriste ba haeso ba Parish ea Mazenod ba neng ba nthata ka lona, 'me ke tla lula ke ntse ke ba rata le ho ba hopola ka linako tsohle. Molimo ea matla ohle a ke a ba hlohonolo-fatse ba sebetse hantle le moprista e mocha, ba mo rate joalokaha bane ba nthata." A na ke mantsoe a Fr. Patrick Khoaele OMI pusanong le Koranta ena kamor'a ho fuoa thomo e ncha ea ho ba motsamaisi oa Pre-Novitiate, Maryland Tikolohong ea Leribe.

A bontša hore ka leb-

ke ho hlokomela hore bakriste bane ba boetse ba tsohile molota, 'me ba kena kereke ka bongata bo hlolang li 'Missa li tla-tsoete! "Ka amohela bakriste ba bangata bao ho neng ho thoe ba se ba lahlile Kereke e Katholike, bao ke neng ke tloetse hore bane ba nkiloe ke sethotsela." A rialo a bile a e ketsa ka hore le Bakate-kumena bane ba e ba teng ka bongata bo boholo.

A supa hore palo ea manyalo a tiisoang e ile ea e ketseha haholo, "hoo nako le nako o neng o tla fumana ho ena le leto-to la manyalo a hlohang ho tiisoa." A re e 'ngoe ea likatleho tse ileng tsa

ke e Katholike ka kakaret-so o itse "bakriste ba rona ha bana litokomane tsa Kereke tsa bohlokoa tsa mantlha e leng lengolo la tlhatsuo, lengolo la kabelo le la lenyalo hoba many-along." A tiisa hore bona ha se bothata bo teng ko-ano Parishng feela, empa karolo e kholo ea bakriste ha bana litokomane tsena tsa bohlokoa tse ba pa-kang hore e fela e le litho tsa Kereke, 'me ba khethe-loa likomiting tse kholo ba ntse ba sena mangolo ana a bohlokoa.

"Re na le tšabo e kholo ea hore likopano tsa Kereke li tla qetella li tsamaisoa ke batho bao e seng Makatholike ha feela ho sa eloe hloko hore na ba kokotang ba kota ba tšoare mangolo ana, eba joale ba ameheloa feela ba sena litokomane tsa Kereke." O boletse joalo a bile a eket-sa ka hore phoso e kholo e hlaha bookameling ba liko-pano, moo litho li khethe-loang maemong a holimo feela ba sena litokomane tsa Kereke.

A qetella ka ho hlokomelisa bohle hore ha feela maemo ana a ke ke a felisoa likopano li tla qetella li tsamaisoa ke batho ba sa hlatsuoang, 'me ha motho eba mokokoti o lokela hore a be a tšoare lengolo la tlhatsuo, la kabelo le le lenyalo ho ba seng ba phela manyalong.

Ho sa le joalo baprista ba bang ba fuoeng thomo ke Fr. Michael Khotso O.M.I ea seng a tliil'o sebet-sa Maria Mofumahali oa Lefatše, Fr. Cletus Ranthamane O.M.I ea seng a il'o sebet-sa Lapeng la Maob-lata le Polasing Ventura, Fr. Philip Mabetha O.M.I ea il'o sebet-sa St. Vicent, Fr. Gabariel Batere O.M.I ea il'o sebet-sa St. Rose Parish, Fr. Simon Mabitle O.M.I eo seng e le eena motsamaisi oa Pius XII, Fr. Francis Masilo O.M.I ea seng a il'o sebet-sa St. Gerard, Fr Francis Ntone O.M.I ea il'o sebet-sa Vil-la Maria le Fr. Augustinus Tente O.M.I ea lebang Sa-maria seterekeng sa Maf-eteng.



aka la lerato le hlompheo ba neng ba mo hlomphe ka eona o ile a ikutloa a phela le batsoali ba hae, kaha kamehla bane ba motšehelitse haholo ka mantsoe a likeletso, likhothaletso le ho mo fa limpho tse fapakaneng tse mo khotatsang le ho mo tsosa morolo e le pontšo ea lerato le hore o ntse a etsa mosebetsi oa Morena Molimo hantle.

A re lilemo tsena tse supileng tseo e saleng alo-sa linku tsa morena har'a likatleho tseo a li fihletseng

mo thabisa haholo ke ho kopanya bakriste ka liko-pano tse fapakaneng, ho ba e etsa ngata-'ngoe ka mekete le ka lisontaha ba bina 'moho. A re taba ena e ne e sa felle feela ka kerekeng, empa e fetela le metseng haholo ha mafu a le teng, "moo o bonang bohle ba itahletse ka setotsoana ha ba boloka litho tsa mofu ea itseng." Katleho ea ho qetela e kholo eo a e boletseng ke 'Missa le Fatima ea bana.

H'a bua ka liqholotso tse tjametseng Parish le Kere-

2025-2026 SELEMO A

SONTAHA SA 25 HAR'A SELEMO



Isaia 55:6-9
Pesalema 144
Ba-Filipi 1:20-24,27
Matheus 20:1-16



Khothatso

Basebetsi tšimong ea morara

Lithuto tseo re qetang ho li utloa li re memela ho bua ka khethollo, (e seng khethollo ea 'mala, e leng khethollo e etsoang ke batho, 'me eo re tsebang hantle hore e fosahetse, hobane e thehiloe holim'a ho hloka toka), empa khethollo ea Morena Molimo, e thehiloeng holim'a mosa le mohau 'me eo e leng tholoana ea lerato la hae.

Seo re se rutoang kajeno ke hore Morena Molimo o mosa, o mohau, o molemo ho bohle, litsela tsohle tsa hae li lokile, o haufi le ba hoeletsang ho eena e le ka 'nete. Seo re se rutoang hape ke hore mohau oa Molimo o feta hole toka ea batho. Mehopololo ea Molimo hase mehopololo ea batho, litsela tsa hae hase litsela tsa batho; litsela tsa Molimo li phahametse litsela tsa rona joaloka leholimo le phahametse lefatše.

Re lokela ho hlalosa mantsoe ana le ho a utloisisa hantle, hobane, kaofela ha rona, re ee re khopisehe ha re utloa evangeli eo re qetang ho e bala, ea papiso ea basebetsi tšimong ea morara.

Re utloile hantle: ba bang ba ne ba kene mosebetsing e sa le hoseng ka 6; ba bang motšeaere oa hoseng, ka 10; ba bang motšeaere o moholo ka 12; ba bang motšeaere oa mantsiboea ka 5, ka nako ea ho koala ha mosebetsi. E ne e le lihlopha tse hlano, tse neng li qalile ho sebetisa ka nako tse fapaneng, leha ho le joalo bohle ba na ba fumana moputso oa tšoanang, ba fihlileng pele le ba fihlileng morao.

Evangeli ena ea re makatsa, 'me re ipotsa hore na ke toka ho lefa basebetsi ba fihlileng morao moputso o tšoanang le oa ba bang ba jereng boima ba letsatsi lohle le mochso oa lona? Na ho sebetisa hora e le 'ngoe le ho sebetisa lihora tse robeli kapa tse leshome le metso e 'meli ke ntho e tšoanang? Na re ka bina joang: Morena o lokile litseleng tsohle tsa hae?

Lipotso tsa rona tsa kajeno ke tsona lipelaelo tse ileng tsa hlalisoa ke basebetsi ba tšimo ea morara. Feela pele re leka ho li araba, a re hlahlolang litaba hantle. Taba, ea pele hase bohle ba ileng ba belaela. Ba ileng ba belaela ke ba neng ba fihlile ka 6 hoseng, e sa le kameso, empa ba ne ba se na tokelo ea ho belaela hobane ba ne ba lumellane ka moputso pele ba qala mosebetsi. Ba bang bohle ha ba ka ba belaela, ba ile baamohela chelete 'me ba ikela, ba thabile, athe bona ba ne ka 'na ba belaela ka ho re: Morena, ka 'nete, eka phoso e teng; u re file chelete e ngata ho feta tekanyo, empa rona ba sa tsoa filha, 'me ha rea sebetisa haholo. Taba ea bobeli eo re tšoanetseng ho e elelloa ke hore ba ileng ba belaela, ha ba ka ba belaela ka moputso oa bona, kapa ka ho hloka toka ha mong'a tšimo, empa ba ile ba belaela ke moputso oa ba bang, le ke khethollo ea mong'a tšimo: "Bana ba morao ba sebetse hora e le 'ngoe feela, athe u ba lekantse le rona."

Karabo ea Morena ea utloahala. O re: Re ile ra lumellana le uena ka moputso 'me ke se ke o file oona, ke eona toka. Ba bang, kea tseba, ha kea ka ka ba fa moputso, empa ke ba file mpho, ka ba tsoela molemo. Na uena u mona hobane ke le molemo?

Potso ena ea qetello ea mong'a tšimo le eona eo re lokelang ho imamella eona: Na uena u mona hobane ke le molemo? Rona batho, re na le tloaelo e fosahetseng haholo ea ho ipapisa le ba bang le ho bua ka toka, ho e-na le ho ipapisa le Morena Molimo le ho bua ka molemo oa hae. Re rata ho tšoana le ba bang, 'me ha re sa tšoane le bona, re phakisa ho re toka ha e eo. Mona hase taba ea ho hloka toka, hobane toka eona e teng. Mona ke taba ea khethollo ea Molimo, e thehilong holim'a mosa le molemo oa hae.

Rona batho re bua ka toka, toka feela, 'me toka ea rona ke hore batho bohle ba tšoane, ka mosebetsi, ka moputso, ka boemo, ka bolulo, ha re batle khethollo efe kapa efe har'a batho: ka mantsoe a mang re felisa mohau mosa le lerato.

'Nete ke hore litsela tsa Molimo hase litsela tsa rona 'me mehopololo ea hae e phahametse ea rona. Ha re talima re fumana hore Morena Molimo o entse khethollo e makatsang, e hlolang ruri, e hlophisitsoeng hantle: letsatsi le khoeli, lithaba le linoka, linaleli, liphoofolo, linonyana ha li tšoane. Le rona batho ha re tšoane.

Joale ka lentsoe la "toka" re rata ho felisa khethollo e ntle ea Morena Molimo. Ka ho felisa khethollo ea Molimo e thehiloeng holim'a lerato la hae, re felisa mohau, mosa, molemo le lerato ka bolona.

Thuto eo re e fumaneng kajeno, ke hore re sebetse ka toka joaloka Morena Molimo, ke tšoanelo ea rona bohle. Empa re se ke ra belaela ka lerato Molimo, ha a fa ba bang ho re feta ka baka la mosa le molemo oa hae. Ke 'nete ba lehlolonolo ho re feta, feela re se ke ra ba mona. Ho ba mona ke ho fapana le lerato la Molimo, ho feta moo ho ba mona ke ho fapana le Sesotho sa rona.

Puo ea rona ea Sesotho e na e lentsoe le monate. Lentsoe lena ke "ho lebohela." Ha motho e mong a fuoa mpho e 'ngoe e itseng, ba bang ba mo lebohela, ba re: "Rea u lebohela." Puo ea sechaba e paka makhabane a sona. Lentsoe lena "ho lebohela" le paka hore rona Basotho re utloisise lerato la Morena Molimo, mosa le molemo oa hae ho feta lichaba tse ngata.

Ho e-na le ho belaela, basebetsi ba tšimo ea morara ba ne ba lokela ho re: "Rea ba lebohela." A re etseng joalo kamehla. Haeba litaba tse ling tsa evangeli li re hlola, bonyane a re lekeng ho utloisisa ena; 'me rona Basotho re ba lipaki tsa mosa le molemo oa Molimo ka ho lebohela ba fuoeng ho re feta.

Bahalaleli har'a Beke

21	Loetse	Hieu
22	Loetse	Lioba
23	Loetse	Irais
24	Loetse	Ysarn
25	Loetse	Cadoc
26	Loetse	Senator

Leeto la Mahala le fella Dobsonville

Tšeliso Thakholi

Bompoli ba Lesotho ba bolo ea maoto, Lijabatho 'Mahala' ba phethetse leeto la bona la ho phunyeletsa ho ea bapala mokhahlelong o hlhlamang oa litlholisano tsa CAF Champions League ka ho bapala ka seahlolo sa 1-1 le CFFA leotong la bobeli la litlholisano tsena tse neng li tsoaretsoe Dobsonville, Afrika Boroa ka Moqebelo oa la 12 Loetse monongoaha.

Leotong la pele le neng le tsoaretsoe Madagascar libekeng tse peli tse fetileng, CFFA e ile ea babola sehlopha sa Lijabatho 2-0, 'me ee ntšitse litlholisanong tsena ka kakaretso ea lintlha tse 3-1. Basotho ba bangata ba neng ba bokane libakeng tse fapakaneng kahar'a naha ho boha papali ena ka tšepo e kholo ea hore Lijabatho e tla ba tlela le tlhlo ba khutletse malapeng a bona lipelo li lutla mali ke ho utloa bohloko.

Ho sa tsotellehe ho hloloa ha eona leotong la pele ho ileng hahla ha lahlisa barati ba bolo tšepo ea hore e tla fetela pele, mokoetlisi oa eona Kabelo Malapene o ne

a ile a ikana le ho otlanya thupa le lefatše hore ba tlii'o iphetela papaling ea bona ea ho qetela empa o ile a teha kalala. Leha Lijabatho e soabisitse le ho phoqa Basotho papaling ena, sena

e bapala lipapali tsa Liki e Kholo ea Lesotho. Ha ho le joalo ke pontšo ea hore lipapali tsa habo rona li sa ntse li le morao haholo, 'me li hloka ho ntlafatsoa haholo. Potso ke hore na ke hobane

ho sehlopha sa Lijabatho, kaha e ne e le lekhetlo la sona la pele se kenela lipapali tsa machaba kamor'a lilemo tse ngata. Ka hona papali ena ea bobeli ene e le monyetla

kenyeletsa lihlopha tse kang Orlando Pirates ea Afrika Boroa e hapileng papali ea eona ka ho shashara La Cure Waves ea Mauritania ka 3-1. Linatla tsa Egypt e leng Zamalek ea pola Ports



e bile thuto bakeng sa libapali tsa eona hore hona le phapang lipakeng tsa lipapali tsa liki le tsa boemo ba machaba.

Tsela eo Lijabatho e bapetseng kateng, e ne e ka

ha sehlopha se bapetseng lipapali tsa sona tsa liki hantle se hloloa ho hapa lipapali tsa machaba? Hantle phoso e hokae?

Ka lehlakoreng le leng papali ena e ne e le nalane

o moholo oa sona ho matlafatsa nalane ena.

Ke lihlopha tse 28 ho phatlalla le tikoloho ea Afrika tse seng li atlehile ho fetela lipapaling tse hlhlamang, 'me har'a tsona ho

FC ka 4-0 'me ea feta ka kakaretso ea 6-1. TP Mazembe e hlotse Medeam ka 3-1 ea feta ka kakaretso ea 4-1 ha Young Africans e hlotse Gaboreone United ka 2-1 ea feta ka kakaretso ea 3-2.

Se tla tsoara tau ka litlena

Tšeliso Thakholi

Sehlopha sa Naha sa U-20, Makoanyane XI se tlii'o qala lipapali tsa mokhahlelo oa pele oa ho ea ho makhaola-khang a Mohope oa CAF U20 African Cup of Nations(U20 AFCON), ka ho bapala le bompoli ba ngoahola, Amajita ea Afrika Boroa, lipapaling tse tlang ho tsoareloa lebaleng la Zimpeto, Mozambique mafelong ana a beke, moo linaha tse 12 tsa Afrika li tlang ho qothisana lehlokoa ho tloha ka la 18 ho isa la 27 Loetse monongoaha.

Sehlopha sa Makoanyane XI se Mokhahlelong oa B, moo tebello e leng hore se tla etsa nalane lekhetlo la pele, ka ho fetela lipapaling tsa makhaola-khang tlasa mokoetlisi e mocha Monghali Bafokeng Mohapi. Makoanyane XI e qetese ho ba kahar'a lihlopha tse 'ne tse neng li tseka ho ea bapala ho makhaola-khang a mohope ona ha

ene e shashara Angola ka 2-1, lipapaling tse neng li bapalloa Naheng ea Benin ka 2005, empa ea hloloa ke Morocco le Egypt, 'me ea qetella e hlhile boemong ba boraro.

Ka 2011 ea boela ea fihlella lipapaling tsa makhaola-khang tse neng li bapalloa Afrika Boroa, empa ea hloloa ke Egypt ka 2-1 le 2-0 ka tatellano le ho bapala le Mali ka seahlolo ea 1-1. Har'a lihlopha tseo e pannoeng le tsona Amajita ke sehlopha sa bobeli se seng se kile sa hapa mohope ona, ha se ne se hlola Morocco ka 1-0 ngoahola papaling e neng e bapalloa Naheng ea Egypt ka 2025. Sehlopha sa pele e bile Angola ha e ne e hlola Ghana ka 2-0 papaling e neng e bapalloa Ethiopia ka 2001.

Sehlopha sa ho qetela sa Mokhahlelo oa B ke sa Kings Sheild ea Eswatini, se e-s'o fihle le ho makhaola-khang ho tloha ha lipapali tsena li qala ho bapala ka 1991. Morero oa bona ke ho tla sebetsa ka thata ho kena lekhetlo la pele lihlopheng tse 'ne, tse tlang ho tseka ho ea bapala ho makhaola-

la-khang a monongoaha.

Lihlopha tse 12 li arotsoe ka mekhahlelo e meraro e leng A e bopiloeng ka Mambinhas ea Mozambique e leng e 'ngoe ea lihlopha tse sa tsoa fihla kahare ho litlholisano tsena ka 2021, moo ka 2023 e ileng ea bula lipapali tsa U20 AFCON ka ho pitikisa mahe le Egypt(0-0), empa ea hloloa ke Senegal le Nigeria.

Lihlopha tse ling tse bo-

pileng Mokhahlalo oa A ke Pirates ea Seychelle e seng e bapetse lipapali tse 'maloa tsa U20 AFCON le Young Warriors ea Namibia e ileng ea finyella lihlopheng tse 'ne tse neng li tseka ho ea bapala ho makhaola-khang ka 2021 Naheng ea Mauritania, 'me Young Warriors ea bapala ka ho lekana le Central African Republic ka 1-1 ha e tla hloloa ke Tunisia le Burkina Faso.

Haele Mokhahlelong oa ho qetela oa C teng ho

pannoe lihlopha tse matla tse kang Junior Chipolopolo ea Zambia e seng ena le boiphihlelo bo boholo lipapaling tsena, e be The Flames ea Malawi e neng e lahleheloe ke lipapali tse tharo kaofela ha e ne e bapala le Zambia, Nageria le Guinea ka 1999. Lihlopha tsa linaha tse ling tse peli e leng Coelacanth ea Comoros le The Zebras ea Botswana bobeli li e-s'ong ho fihle ho makhaola-khang a lipapali tsena ho hang.



Senuka se qala ka sekhhahla



Tseliso Thakholi

Liki e bopiloeng ka mekhahlelo e 'meli ea papali ea Senuka, e leng First

Division le Second Division li qalile ka sefutho se seholo mabaleng a fapakaneng kahare ho naha, moo teng lihlopha tse robong tsa First Division le tse 16 tsa Second Division li ileng tsa

ntšana bothaka mafelong a tsoa feta a beke.

Lihlopha tsena tsa Liki e Kholo ea First Division tse qalileng lipapali tsa tsona ka matla a maholo ke Bakwena, Airbornes, MCP

Sharks, Pasco, Seleso Masters, Ciscos, Monneng, Lifateng, Marabele, Cue Masters, LDF, Drop Zones, Phahameng, KTA, Parabae, Ghetto Invaders le Lacasa. Ke mona moo papaling

ea pele Airborne e ileng ea iketsetsa borata ka Bakwena ka ho e tlabola 16-9. Papaling e hlahlamang ea letsatsi leo Drop Zones ea shapa Phahameng ka 15-10. Papali e neng e bohlooe ke barati le batšehetsi ba Senuka ba bangata haholo, ke moo MCP e ileng ea tlontlolla Sharks ka ho e masola 17-8. Papali e 'ngoe e bileng matla haholo ke ha Monneng etsoa ka lesoba la nale ha ene e hlola Ciscos ka 13-12.

Haele LDF e ile ea e lata letailana habo Lifateng 'me ea fihla ea e teteke 14-11 kapel'a batšehetsi ba eona, ha Sekoele e ile ea etsa limaka ka ho shapa Mookoli ka 21-4 ea ba ea lula kaholimo lokong ka lintlha-kholo tse supileng. E lekana le Airborne, MCP le LDF mae-mong a bobeli, a boraro le a bone ka tatellano.

Har'a lihlopha tsena tse seng li qalile liki ka matla, Sekoele e bonahetse e itokisitse haholo ho feta ngoahola, 'me boithopho ba eona ke bo bottle haholo. Ha ho bonahale ho ena le moo e kang e salletse morao teng. Se thabisitseng babo-hi ke hore libapali tsa eona li ne li le teng li felletse. Hona ke sesupo sa maikemisetsa a maholo selemong sena.

Tsela eo lipapali tsa Senuka li qalileng ka teng mabaleng ka ho fapakana ha ona, ke pontšo ea hore papali ena e'a hola kahare ho naha, 'me sehlokahalang ke hore batšehetsi ba kenye letsoho le toma ho e matlafatsa haholo. Ho fihlela ha joale ke lihlopha tsa First Division tse 20 tse seng li qalile lipapali tsa tsona ka matla a maholo. Haele Sharks e se e qalile ho salla mosalla ruri! Hoba e boemong ba bo-20 ka ntlha-kholo e le 'ngoe feela.

Haele ka ho Second Division ke lihlopha tse 17 tse seng li qalile lipapali tsa tsona, 'me Chillers e ka holimo-limo lokong kamor'a ho shapa Lovely Nest ka 21-14. Coolside e boemong ba bobeli hang ho ba e hlola Hata-Butle Masters ka 13-12, ha Telemedia e ntse e setse maemong a bone ha e ne e qeta ho hata Mahatakele le ho e hlokisa botsitso ka 17-8.

Athe Lehafing e lutse maemo a bone ka ho hlola Lekhotleng ka 15-10. Mae-mong a ho qetela a loko ke Uncle Max e qalileng e hula ka boima kaha ha ena letho ka mokotleng. Ka mokhoa o tsoanang le Golden Rose e maemong a bo-16 lokong ha ena letho ka khetsing.

Stanlib e theha selekane

Tseliso Thakholi

President ea Mokhatlo oa Lesotho o Tsamaisang Bolo ea Maoto (LeFA), Monghali Lijane Nthunya o thoholelitse le ho leb-o-ha Kampani ea Stanlib ka ho theha selekane sa pele sa mofuta oa sona le Komiti ea Lesotho e Tsamaisang Papali ea Bolo (PLMC), nalaneng ea bolo ea maoto kahare ho naha, sa ho fana kakhau ho sebakali se tla ipabola lipapaling tsa Liki e Kholo ea Vodacom tsa selemo sa 2026/2027. Tsena li etsahetse 'mokeng oa baphatlalatsi ba litaba tsa lipapali o bileng Bambatha, Maseru, ka la 15 Loetse monongoaha.

O boletse hore pono ea LeFA ke ho khutlisetsa moea oa ho hlola kahare ho libapali le lihlopha tsa bolo, 'me tšehetso ena eo Stanlib e faneng ka eona e tsamaellana hantle le mohopolo ona oa bona. "Mohopolo ona oa ho tlotla libapali tse ipabotseng ka ho fana ka limpho ke taba e teng kahare ho mohoo oa rona, 'me ha o tlotla motho bakeng sa tšebetso ea hae e ntle oa mo khothatsa le ho motsosa morolo a be matla ho feta pele." A rialo.

A re mosebetsi oa bona oa mantlha ke ho ntlafatsa papali ea bolo le boleng ba eona. A re ngongoreho ea hae e kholo ke ho bona hore ba ntse ba le morao haholo papisong le linaha tse ling, 'me ka tšehetso ena ea bohlokoa ba tli'o thusa hore ba thetsane ka mahetla ho ntlafatsa papali

ea bolo ea maoto, "e le hore re tsebe ho ea ka pejana ho ba bang bomphato'a rona bao re neng re ntse re le ka pejana ho bona linakong tsa ho feta."

A re leha taba ena ea ho fana ka likhau ho libapali tse ipabotseng e ile ea rothela lipapaling tse itseng tsa Liki e Kholo selemong se fetileng sa lipapali, empa kajeno e etsa nalane, kaha e tla be e qala ho etsahala lipapaling kaofela tse 240 tsa selemo sena. "Ke leboha haholo hobane kajeno le bone ho le molemo hore le thetsane ka mahetla le papali ea bolo ea maoto, hobane ka ho etsa joalo le tla be le kenya letsoho ntlafatsong ea bolo." O boletse joalo.

A re mona moo ba qalileng teng e leng lipapaling tsa Liki e Kholo ke sona sefahleho sa papali ea bolo boemong ba naha, 'me taba ena e bohlokoa haholo hobane e tli'o khothaletsa libapali hore li sebetse ka thata haholo. Ka hona ha

ba sebetse ka thata ho tli'o etsa hore lihlopha tsa bona li sebetse hantle. Kaholimo ho tsohle taba ena ea phano ea likhau e tli'o tliša phe-toho bophelong ba libapali.

A qetella ka hore tlatsetso ena eo Stanlib ka lebaka la boipabolo ba sebakali ka seng, e tli'o etsa phapang e kholo ho sebakali se tla beng se fumanoe e le sona se ipabotseng. "Ke tiea ke hlapanya hore ketso ena e tli'o tla e etsa phetoho e kholo ntlafalong ea papali ea bolo kahare ho naha." Ke eena eo.

Molula-Setulo oa PLMC, Monghali Letsie 'Nokoane o itse tšehetso ena ke katleho e kholo ho bona, ea hore ha ba qala lipapali tsa liki ebe ba thakhola ketsahalo ena e kholo e etsang nalane kahare ho papali ea bolo. A re taba ena ba e nka e le tlotla e kholo, kaha papali ka 'ngoe ho tla fuoa sebakali se ipabotseng khau. A re taba ena ke nalane ea hore e be ha ba qala liki ba se ba fumana tšehetso e kholo ha

kana, e tli'o phahamisa papali ea bolo ea maoto.

Motsamaisi oa Stanlib Monghali Mohlabinyane Mohapi o itse morero o moho-o oa kampani ea habo ke ho khutlisetsa sechabeng, e le karolo ea mesbetsi ea eona ea ho keteka sehopotso sa lilemo tse 25 e sebeletsa Basotho ka lerato le ka botšephehi. A re kamor'a ho amohela kopo ea PLMC ea ho tšehetsa morero oa ho fana ka khau ho sebakali ka seng se ipabotseng bakeng sa selemo sena sa lipapali, kampani ea habo e nehela ka chelete e kaalo ka M250,000.00, moo sebakali ka seng se ipabotseng papaling ka 'ngoe ea liki se tla fuoa mpho ea chelete e kaalo ka M1,000.00.

A qetella ka hore ea ikhaphetseng tlhola o tla tsejoa e le Stanlib Man of the Match. A re khetho ea sebakali se ipabotseng papaling ka 'ngoe e tli'o etsoa ke sehlopha se khethiloeng se nang le boiphihlelo papaling ea bolo ea maoto.

